

11 -March - 2026

समा. 09.20 Hrs



Headlines

1. केन्द्री मंत्री मंडल नै “जल जीवन मिशन” गी दिसम्बर 2028 धोड़ी बधाने दे प्रस्ताव गी मंजूरी दिती ऐ।
2. राजौरी जिले च बन्ने पारा घुसपैठ दी कोशश नाकाम इक आतंकवादी ढेर।
3. जम्मू-कश्मीर च बक्ख-बक्ख सरकारी मैहकमें च 40 जहार कोला मतियां असामियां खाली पेदियां- मुख्ख सचिव होंरें भर्थी प्रक्रिया च तेजी आहन्नने पर दिता जोर।
4. श्रीनगर च एशिया दा सब्बनें शा बड्डा ट्यूलिप गार्डन 16 मार्च थमां आम लोकें लेई खोली दिता जाहग। मुख्खमंत्री करगंन शुरुआत।
5. दिल्ली च आयोजित “आहार-2026 मेले” च जम्मू-कश्मीर नै बी अपने कृषि ते खाद्य उत्पादें दा कीता प्रदर्शन।



Cabinet Decision (Byte)

प्रधानमंत्री नरेन्द्र मोदी हुंदी अध्यक्षता आहले केन्द्री मंत्रीमंडलै “जल जीवन मिशन” गी दिसम्बर 2028 तगर बधाने गी मंजूरी देई दिती ऐ ते एहदे लेई रकमें गी बी बधाइयै कोई 8 लक्ख 70 जहार करोड़ रपे करी दिता ऐ। इस बारे नर्मी दिल्ली च मीडिया गी जानकारी दिंदे होई केन्द्री सूचना ते प्रसारण मंत्री अश्विनी वैष्णव होंरें दस्सेया जे मंत्रीमंडल नै जलशक्ति मंत्रालय दे प्रस्ताव गी मंजूरी देई दिती ऐ- जेहदे च “जल जीवन मिशन” दी अमलावरी बेहतर ते मता असरदार बनाने दी पेशकश बी कीती गेदी ही- जेहदे च एहदे लेई बेहतर ढांचा तयार करने कोला लेइयै एहदी सेवा असरदार ढंगै सिर लोकें तगर पुजाना दी बी बवस्था शामिल ऐ। मंत्री होंरें आखेआ



Terrorist Killed

नशैहरा दे झंगड़ इलाके च कल इक टाकरे च इक पाकिस्तान समर्थित आतंकवादी मारेया गया ऐ। जानकारी मुजब कल दपैहरी मगरा कोई त्रै क बजे उत्थे दंडु आतंकवादियें दी मजूदगी बारे इक टकोहदी सूह थहोई ही- जेहदे बाद व्हाईट नाइट कोर दे जोआनें तुरत कार्रवाई शुरु कीती ते नियंत्रण रेखा दे पारै थमां आतंकवादियें दी घुसपैठ दी कोशश गी नाकाम करी दिता। इससै दौरान छिड़े दे टाकरे

च इक आतंकवादी मारेया गेआ- पर इस दौरान नियंत्रण रेखा दी कोई लोआंगना नई होई। दुए आतंकवादी लेई तुपाई अभियान चलाया गेदा ऐ ते सैनिक इलाके गी खरी चाल्ली खंगाला करदे न। एहदे लेई इलाके च गश्त जारी ऐ ते ब्हाई निगरानी बी बरोबर जारी ऐ तांजे इलाके दी सुरक्षा जकीनी बनाई रखी जाई सके।



Vacant Vacancies

सामान्य प्रशासनिक विभाग- GAD दे कमीशनर सैक्रेटरी एम. राजू होरें आखेआ ऐ जे जम्मू-कश्मीर दे बक्ख-बक्ख सरकारी मैहकमें च कुल 40 ज्हार 661 असामियां खाली पेदियां न। इंदे च 3 ज्हार 808 असामियां गजटेड- 24 ज्हार 507 नान गजटेड ते 12 ज्हार 351 MTS दियां असामियां न। मुख सचिव अटल डुल्लु हुंदे आसेआ जम्मू च लाई गेदी इक समीक्षा बैठक दे दरान एह जानकारी सांझी कीती गई। सेहत ते डाक्टरी शिक्षा विभाग च सब्बनें शा मती असामियां खाली पेदियां न। मुख सचिव होरें भर्थी प्रक्रिया च तेजी आहनने ते खाली पेदियें असामियें गी बड़ी तेजी कन्ने पुर करना जकीनी बनाने दे निर्देश जारी कीते न।



Free Coaching Rajouri (Byte)

“बेटी बचाओ-बेटी पढ़ाओ” आहली पैहल तैहत राजौरी जिले दे अकाक्षी ब्लाक ख्वास ते कोटरंका च कुड़ियें आस्तै मुफ्त कोचिंग दी बवस्था कीती गई ऐ। एहदे तैहत इनें दंऊ ब्लाके च 14 कोचिंग सैन्टरें च दंऊ शिफ्टें च क्लासां लाइयां जाहंगन। इस प्रोग्राम तैहत साइडे 4 सौ कुड़ियें अपने नां दर्ज कराई लैते देन। एह पैहल समाज कल्याण मैहकमे आसेया कीती गई ऐ तांजे ओ कुड़ियां- जेहड़ियां 10मीं दे बाद कोचिंग दी सुविधा नई होने कारण पढ़ाई छुड़ी दिंदियां न- उंदा अग्गे पढ़ाई करने लेई दिल बधै ते मुकाबलेबाजी आहले मतेयानें च बी ओ हिस्सा लैन। राजौरी दे जिला विकास कमीशनर अभिषेक शर्मा होरें आखेआ जे इस पैहल दी मदद कन्ने शिक्षा राएं कुड़ियें दा सशक्तिकरण यकीनी बनोग



Itoo Childcare

समाज कल्याण- सेहत ते डाक्टरी शिक्षी मैहकमे दियां मंत्री स्कीना इतू होरें प्रदेश च शुरुआती बचपन आली दिक्खभाल ते शिक्षा प्रणाली दा दर्जा बधाने लेई कल इक समीक्षा बैठक दी प्रधानता कीती। बैठक दरान आंगनवाड़ी केन्द्रें गी शुरुआती शिक्षा आली थाहरें च तब्दील करने ते एकड़ी थाहरें गी बच्चें दे अनुकूल- ढांचे ते माहिर अमले कन्ने लैस करने बक्खी चेचा ध्यान दिता गेआ। सरबंधत अधिकारियें गी आखेआ गया ऐ जे ओह इक समेबद्ध कार्य-योजना त्यार करने दे इलावा मैहकमें बश्कार तालमेल गी बधान ते पोशण दे महत्व बारे बच्चें दे माता-पिता गी होर मता जागरूक बी बनान।



ते हुंन बाकि दिएं खबरें कन्नै विजय बजाज:-



Tulip Garden Reopens (Byte)

एशिया दे सब्बनें शा बड्डे इंदिरा गांधी मैमोरियल ट्यूलिप गार्डन गी ऑंदी 16 मार्च थमां सैलानिये लेई खोलेया जा'रदा ऐ। फुल्लें आले इस सलाना उत्सव दे दरान तकरीबन 70 किस्में दे 18 लकख शा मते रंग-बिरंगे ट्यूलिप दे फुल्ल- लोके गी आकर्शित करडन। मुख्मंत्रि उमर अब्दुल्ला- सैलानिये लेई इस बगीचे गी औपचारिक तौर पर खोलडन। फुल्लें दी काशत आले मैहकमे दे ड्रैक्टर मथूरा मसूम होरें आखेआ ऐ जे ट्यूलिप गार्डन- सैलानिये दे सुआगत लेई पूरी चाल्ली त्यार ऐ। इस सरबंधे च कीती जा' रदिये त्यारिये बारे बचार सांझे करदे होई उ'नें आखेआ



JK AAHAR

नमीं दिल्ली च जारी "आहार 2026" मेले दे 40में संस्करण च जम्मू-कश्मीर- कृषि ते खाने-पीने आली चीजे गी डब्बाबंद करने सरबंधी अपनी समृद्ध विरासत दा आलमी सतह उप्पर प्रदर्शन करा' रदा ऐ। जंदी 10 मार्च थमां 14 मार्च धोड़ी भारत मंडपम च आयोजित 5एं दिनें दी एह नमैश खाने-पीने ते खातिर-तवाजा आले कारोबार कन्नै जुडे दे एशिया दा सब्बनें शा बड्डा कार्यक्रम ऐ। जम्मू-कश्मीर दे पंडाल च जी.आई टैग आले उत्पादे जिआं केसर- राजमाह- बासमती चौले ते मखीर सनें सुक्के मेवे- मसाले ते तेल वगैरा दा प्रदर्शन कीता जा'रदा ऐ। इस कार्यक्रम दा उदघाटन केन्द्री उद्योग ते बपार मंत्री पीयूष गोयल होरें कल कीता हा।



Auto Security Portal

जम्मू-कश्मीर दी सरकारें- इमारते सरबंधी संगठित उप-नियमें 2021 च संशोधनें गी अधिसूचित करदे होई बपार-कारोबार दे तौर-तरीके गी सखल्ला बनाने गी बढ़ावा देने लेई अपने-आप जांच आला इक पोर्टल बी शुरु कीता ऐ। Auto DCR तकनीक कन्नै लैस एह नमां पोर्टल- इमारते सरबंधी मंजूरिये गी डिजिटल ते समेबद्ध बनाने दे कन्नो-कन्नी जिमी दे इस्तेमाल च बदलाव ते घट्ट जोखिम आली इमारते लेई आपू-प्रमाणन दी सुविधा बी देग। एहदे नै कम्मकाज च तेजी ते पारदर्शिता जकीनी बनोग।



Udhampur Surya Ghaar (Bytes-2)

उधमपुर जिले च "पी.एम. सूर्यघर" योजना दी असरदार अमलावरी कन्नै एहदे प्रति लोके दा रुझान बी बधदा जा'करदा ऐ। मते-मते लोक इस योजना तैहत अपने घरे पर सोलर पैनल लोआइये बिजली दा खर्चा बी बचा करदे न। स्हाड़े जिला संवाददाता नै जानकारी दिती ऐ कि अजे धोड़ी 700 कोला मते सोलर युनिट लोआइ लैते गोदे न ते केइये होरनें पर कम्म चलै करदा ऐ। उधमपुर दे AEE

अनुज गुप्ता हों आकाशवाणी कन्ने गल्ल करदे होई दस्सेया जे “पी.एम. सूर्यघर” योजना गी लेइयै लोके च बड़ा मता उत्साह ऐ कि एहदे नै बिजली दा खर्चा घटा ऐ- परती-परतियै दे बरती जाई सकने आहली ऊर्जा गी बढ़ावा थोआरदा ऐ। इक लाभार्थी नै स्कीम बारे गल्ल करदे होई आखेआ

कल जिला विकास कमीशनर मिंगा शेरपा हों “पी.एम सूर्यघर” योजना दी अमलावर- प्रगति ते उपलब्धिये दी समीक्षा लेई सरबंधि अफसरें- एजेंसी दे प्रतिनिधिये ते होरने हितधारके कन्ने बैठक बी लाई ही।



Bovine Transportation Banned

जम्मू दे जिला मैजिस्ट्रेट राकेश मन्हास हों जम्मू थमां गवें- मेइयें-दांदें- झोट्टें ते होरने दुधारु पशुएं गी कुसै होर जिले च लेई जाने पर पाबंदी लाई दिती ऐ। भारती नागरिक सुरक्षा संहिता दी धारा 163 तैहत जारी इक हुकमा च कुसै बी पशु गी लेई जाने लेई जिला मैजिस्ट्रेट डी.सी. जां अतिरिक्त जिला मैजिस्ट्रेट ADC कोला लिखित मंजूरी हासल करना लाजमी होग- उब्बी कुसै खास वजह या लोड दे चलदे। एह पाबंदी तुरंत प्रभाव कन्ने लागू होई ऐ ते अगले दंऊ महीने जां अगले हुकम दे जारी होने तगर अमल च रौहग। हुकमे दी खलाफवर्जी करने आहलें गी भारतीय न्याय संहिता दी धारा 223 तैहत सजा दा साना करना पोग।



Read by : **Jagmohan Shama and Vijay Bajaj**
D.E.O : **Rajni Devi**
Skilled : **Rajat Paul**
Editor : **Abhilasha Sharma**